

皇清經解

皇

清

經

解

皇清經解卷一千三百九十一

學海堂

經義叢鈔

錢塘嚴杰補編

讀書叢錄

臨海洪州倅頤煊注

王弼易注

隋書經籍志周易十卷魏尚書郎王弼注六十四卦六卷韓康伯注繫辭以下三卷王弼又撰易畧例一卷釋文序錄亦云王輔嗣止注大經講者相承用韓注以下續之頤煊案南齊書陸澄傳時國學置鄭王易澄謂尚書令王儉曰弼於注經中已舉繫辭故不復別注今若專取弼易則繫說無注是其時尚未以韓注續也

經分上下篇

易緯乾鑿度陽道純而奇故上篇三十所以象陽陰道不純而偶故下篇三十四所以法陰頤煊案陽象天道故以乾坤天地爲始以坎離日月爲用陰法人事故以咸恒男女爲始以旣未濟水火爲用天道有屯亨故以泰否居中人事有得失故以損益居中

文王作爻辭

釋文序錄宓犧氏始畫八卦因而重之爲六十四文王拘於羑里作卦辭周公作爻辭頤煊案三國志管輅傳上追文王六爻之旨下思尼父彖象之義此以爻辭亦文王作

貞丈人

師貞丈人吉釋文貞丈人絕句頤煊案說文貞卜問也周禮天府鄭注鄭司農云貞問也易曰師貞丈人吉問于丈人大卜鄭

注貞之爲問問於正者必先正之乃後問焉易曰師貞丈人吉貞又通作偵禮記緇衣易曰恆其德偵鄭注偵問也

輿尸

六三師或輿尸王注以陰處陽以柔乘剛進則无應退无所守以此用師宜獲輿尸之凶頤煊案周禮夏官輿司馬鄭注輿衆也左氏成二年傳無令輿師淹於君地杜預注輿衆也爾雅釋詁尸主也謂或以衆人主師則无功故凶

尙德載

小畜上九尙德載阮尙書校勘記古本載上有積字頤煊案王注體巽處上剛不敢犯尙德者也爲陰之長能畜剛健德積載者也注本有積字虞翻曰坎雲復天坎爲車積載在坎上故上

得積載亦當有積字

匪其彭

大有九四匪其彭釋文子夏作旁頤煊案王注旁謂三也王弼
本亦作旁釋名釋兵篇彭排彭旁也在旁排敵攻禦也邢昺爾
雅疏今謂之旁牌墨子備城門篇若彭有水濁非常者必穴土
也彭卽旁字

貫魚

剝六五貫魚以宮人寵王注貫魚謂此眾陰也駢頭相次似眾
陰也頤煊案考工記梓人鄭注連行魚屬賈疏魚唯唯行相隨
故謂之連卽此貫字之義

口實

頤自求口實山井鼎周易考文作自求口食頤煊案鄭注坤載
養物而人所食之物存焉觀其求可食之物則貪廉之情可別
也鄭本作食

朵頤

初九觀我朵頤王注朵頤者嚼也正義朵是動義如手之捉物
謂之朵也頤煊案朵頤卽染頤說文染从水朵聲徐鍇曰說文
無朵字朵爲朵字之譌朵卽染字之省釋文朵京作揣揣當是
揣字之譌儀禮公食大夫禮以辯揣於醢鄭注揣猶染也卽其
證

士夫

大過九五老婦得其士夫頤煊案荀子非相篇婦人莫不願得

以爲夫處女莫不願得以爲士楊倞注士者未取妻之稱易曰老婦得其士夫

麗乎土

離彖百穀草木麗乎土釋文王肅本作地頤煊案初學記卷二一切經音義卷六引易皆作麗於地說文麗字注引易曰百穀草木麗於土宋本說文作麗於地皆同王肅本

咸其輔頰舌

咸上六咸其輔頰舌釋文孟作俠頤煊案說文輔頰也廣雅輔謂之頰輔頰同物不應連名當從孟喜作俠淮南說山訓高誘注俠輕也俠舌謂輕言與下滕口說義正相應

肥遯

遯上九肥遯无不利頤煊案後漢書張衡傳利飛遁以保名李
賢注淮南九師道訓曰遁而能飛吉孰大焉王注憂患不能累
矰繳不能及是以肥遯无不利字亦當作飛

不詳也

大壯上六象不能退不能遂不詳也釋文詳審也鄭王肅作祥
善也頤煊案正義祥者善也進退不定非爲善也故云不祥也
正義本作祥虞翻曰乾善爲祥不得三應故不祥也本亦作祥
箕子之明夷

明夷六五箕子之明夷釋文蜀才箕作其頤煊案王注最近於
晦與難爲比險莫如茲而在斯中猶闇不能沒明不可息注亦
以箕爲其讀子爲茲正義箕子之明夷者六五最比闇君似箕

子之近殷紂非注義

若濡有愠

史九三獨行遇雨若濡有愠无咎王注若不與眾陽爲羣而獨行殊志應於小人則受其困焉遇雨若濡有恨而無所咎也頤煊案愠當作緼禮記玉藻緼爲袍鄭注緼謂今纈及舊絮也言遇雨若濡有緼絮可以禦溼故无咎旣濟濡有衣袽王注濡宜曰濡衣袽所以塞舟漏也袽以塞舟漏緼以禦雨其義同也

金柅

姤初六繫于金柅釋文說文作柅云絡絲跣也讀若昵王肅作柅從手頤煊案說文屎簍柄也重文作柅方言簍椹也郭璞注所以絡絲櫛柅本一物正義云王肅之徒皆爲織績之器婦人

所用字亦當作梔釋文云從手作梔者譌也太平御覽卷八百二十五引易作梔卽陸德明所見王肅本

以杞包瓜

九五以杞包瓜正義子夏傳作杞匏瓜薛虞記云杞性柔刃宜屈撓似匏瓜頤煊案王注包瓜爲物繫而不食者也正義匏瓜爲物繫而不食則注疏本皆作以杞匏瓜

其形渥

鼎九四其形渥頤煊案周禮司烜氏鄭注屋讀如其刑剗之剗漢書敘傳底剗鼎臣服虔曰周禮有屋誅誅大臣於屋下不露也易曰鼎折足其形渥凶字當從鄭本作其形剗虞翻曰渥大形也亦當與服鄭本同

皇清經解 卷三十三
女歸吉也

漸彖女歸吉也釋文王肅本作女歸吉利貞頤煊案下文進得位往有功也是釋利字進以正可以正邦也是釋貞字其位剛得中也止而巽動不窮也是申釋進得位二句之義據文義當有利貞二字

自藏也

豐上六象自藏也釋文眾家作戕馬王肅云殘也頤煊案淮南說林訓高鳥盡而良弓藏高誘注藏猶殘也

用拯馬壯吉

渙初六用拯馬壯吉山井鼎考文古本吉下有悔亡二字頤煊案虞翻曰坎爲馬初失位正動體大壯得位故拯馬壯吉悔亡

之矣虞本吉下有悔亡二字

鬼方

既濟九三高宗伐鬼方惠氏周易古義商時鬼方周時荆楚之地引汲郡古文武丁三十二年伐鬼方次于荆三十四年王師克鬼方氏羌來賓爲證頤煊案鬼方不止荆楚之地當連西戎言之後漢書章帝紀克伐鬼方開通西域西羌傳武丁征西戎鬼方三年乃克故其詩曰自彼氏羌莫敢不來王文選趙充國頌李善注鬼方於漢則先零戎也

幽明

繫辭上是故知幽明之故原始反終故知死生之說韓注幽明者有形无形之象頤煊案淮南原道訓幽兮冥兮應無形兮漢

皇清經解 卷三十三
書楚元王傳則幽冥而莫知其原師古曰幽冥猶暗昧也幽明
卽幽冥本亦作窈冥老子道經窈兮冥兮其中有精莊子在宥
篇至道之精窈窈冥冥素問從容論吾問子窈冥王冰注窈冥
謂不可見者窈本又作杳皆同聲通用字

旁行而不流

旁行而不流頤煊案此五字當在與天地相似句下與天地相
似旁行而不流故不違知周乎萬物而道濟天下故不過樂天
知命故不憂安土敦乎仁故能愛文義皆相對旁並也史記旁
河旁海字皆作並旁行而不流禮記中庸所謂道並行而不相
悖也

故君子之道鮮矣

故君子之道鮮矣釋文鮮師說云盡也頤煊案詩瓠葉有鬼斯首鄭箋斯白也今俗語斯白之斯作鮮齊魯之間聲近斯爾雅釋詁鮮善也釋文本或作誓沈云古斯字詩皇矣王赫斯怒鄭箋斯盡也故師說從之

何以守位曰仁

繫辭下何以守位曰仁釋文曰人王肅卞伯玉桓玄明僧紹作仁頤煊案漢書食貨志後漢書蔡邕傳引皆作仁文選張平子東京賦守位以仁薛綜作人禮記禮運鄭注何以守位曰仁釋文本亦作人

蒼筤

說卦震爲蒼筤竹釋文筤或作琅通頤煊案藝文類聚卷八十

九初學記卷十引易曰震爲蒼琅竹蒼琅言其竹色之青似琅玕漢書五行志木門倉琅根師古曰銅色青故曰倉琅說文無簣字

爲白

巽爲白正義爲白取其風吹去塵故絜白也顧煊案白卽帛字賁六五束帛戔戔虞翻曰巽爲帛爲繩是虞氏易作爲帛也詩六月白旆央央孫炎爾雅注作帛旆央央禮記玉藻大帛不綏鄭注帛當爲白聲之誤也白帛古字通用

百兩篇尚書

漢書儒林傳世所傳百兩篇者出東萊張霸分析合二十九篇以爲數十又采左氏傳書序爲作首尾凡百二篇篇或數簡文

意淺陋頤煊案論衡感類篇伊尹死時天何以不爲雷雨應曰以百兩篇曰伊尹死大霧三日正義引尙書緯孔子求書得黃帝玄孫帝魁之書定可爲世法者百二十篇以百二篇爲尙書十八篇爲中候其說皆本於張霸

古文官書

隋書經籍志古文官書一卷後漢衛敬仲撰史記儒林列傳正義漢書儒林傳師古注俱引作衛宏詔定古文尙書頤煊案衛宏從杜林學林前於西州得漆書古文尙書一卷韓愈科斗書後云李服之者陽冰子授予以其家科斗書孝經衛宏官書兩部合一卷官書卽漆書以其詔定故亦稱官書新唐書藝文志作衛宏古文字書者誤也說文勸字注引衛宏說史記五帝本